

Na osnovu člana 16. stav 2. Zakona o Vladi Zeničko-dobojskog kantona-Prečišćeni tekst („Službene novine Zeničko-dobojskog kantona“, broj 7/10), na prijedlog Stručne službe Vlade Zeničko-dobojskog kantona, Vlada Zeničko-dobojskog kantona, na 106. sjednici održanoj dana 04.04.2013. godine, d o n o s i

O D L U K U
O STANDARDNOJ RADNOJ STANICI
U ZENIČKO-DOBOJSKOM KANTONU

Član 1.

(Predmet)

Ovom odlukom Vlada Zeničko-dobojskog kantona (u daljem tekstu: Vlada) propisuje konfiguraciju standardne radne stanice kantonalnih organa uprave i stručnih službi, te kantonalnih upravnih organizacija, u pogledu hardverskih i softverskih zahtjeva, radi postizanja kompatibilnosti i stvaranja jedinstvenog radnog okruženja.

Član 2.

(Opći tehnički uslovi)

(1) Informatička oprema koju koriste zaposlenici kantonalnih organa uprava, stručnih službi i kantonalnih upravnih organizacija (u daljem tekstu: zaposlenici) mora zadovoljavati minimalne tehničke uslove kako bi isti mogli što efikasnije obavljati svoje radne zadatke i razmjenjivati informacije sa ostalim zaposlenicima i poslovnim partnerima.

(2) U skladu sa potrebama radnog mjesta, korisnici mogu biti standardni i napredni, od čega zavise tehnički uslovi. Svi zaposlenici su normalno standardni korisnici, a rukovodilac organa određuje napredne korisnike.

(3) Za nabavke nove opreme se određuju standardni tehnički uslovi. Napredni tehnički uslovi se određuju pojedinačno od slučaja do slučaja.

Član 3.

(Tehnički uslovi radnih stanica)

(1) Svaka radna stanica mora zadovoljavati minimalne tehničke uslove u pogledu hardvera, kako bi se omogućio nesmetani rad. Radne stanice koje ne zadovoljavaju minimalne tehničke uslove se predlažu za otpis uz pribavljeno mišljenje Odjeljenja za informatičku podršku Stručne službe Vlade Zeničko-dobojskog kantona (u daljem tekstu: Odjeljenje).

(2) Pri nabavci računara se poštuju standardni tehnički uslovi koji će se definisati u postupku nabavke i u skladu sa potrebama radnog mjesta. Rukovodilac organa može tražiti posebne tehničke uslove za naprednog korisnika.

(3) Radne stanice koje se nabavljaju moraju imati najmanje godinu garancije od strane proizvođača, te osigurane rezervne dijelove od strane isporučioaca.

Član 4.

(Operativni sistem)

(1) Radne stanice u pravilu rade pod istim operativnim sistemom (sistemskim softverom).

(2) Rukovodilac organa može donijeti odluku o nabavci posebnog operativnog sistema u slučaju specifične potrebe određenog programa.

(3) Na svaku radnu stanicu mora biti postavljen način na koji se korisnici prijavljuju za rad sa korisničkim imenom (user name) i šifrom (password).

(4) Operativni sistem mora imati regionalne postavke i postavke jezika čime se dobiva pravilan format datuma i rad tastature.

(5) Operativni sistem i programi na računaru mogu biti na engleskom, bosanskom, srpskom ili hrvatskom jeziku, u zavisnosti od mogućnosti i potreba korisnika.

(6) Svaka radna stanica u pravilu ima sljedeće funkcije: rad u uredskom paketu (programi za obradu teksta, tabela i prezentacije), PDF pregled, PDF štampač, rad sa arhivama, pregled slika, pregled videa, pretraživanje Interneta, komunikacija putem e-pošte, zaštita od virusa. Rukovodilac organa može u cilju sigurnosti onemogućiti pristup Internetu.

(7) Svaka radna stanica mora imati i potrebne pomoćne programe.

(8) Radna stanica može imati i posebno nabavljene programe, o čemu odluku donosi rukovodilac organa.

(9) Na radnim stanicama koje koriste napredni korisnici mogu se postaviti i drugi programi, o čemu odluku donosi rukovodilac organa u pojedinačnim slučajevima.

(9) Operativni sistem i programi postavljeni na računaru, na kojem je to moguće, se automatski ili ručno ažuriraju u cilju zaštite od propusta i popravka funkcionalnosti.

Član 5.

(Isključenje primjene Odluke)

Ova Odluka se ne primjenjuje na Ministarstvo unutrašnjih poslova Zeničko-dobojskog kantona.

Član 6.

(Provođenje Odluke)

Za provođenje ove odluke zadužuje se Odjeljenje.

Član 7.

(Stupanje na snagu)

Ova odluka stupa na snagu osmog dana od dana objavljivanja u "Službenim novinama Zeničko-dobojskog kantona".

Broj: 02-_____ /13.

Datum, 04.04.2013. godine

Z e n i c a

PREMIJER

mr. sci. Fikret Plevljak, dipl. ing.

DOSTAVLJENO:

1x Svim kantonalnim organima uprave,

stručnim službama i kantonalnim upravnim organizacijama,

1x Stručnoj službi Skupštine,

1x "Službene novine Zeničko-dobojskog kantona",

1x a/a.